



Socijaldemokratska partija Bosne i Hercegovine
Forum mladih SDP BiH

Socialdemocratic Party of Bosnia and Herzegovina
Youth Forum SDP B&H

PROGRAM

Adresa:

Alipašina 41
71000 Sarajevo
Bosna i Hercegovina

Kontakt:

Telefon/fax: +387 (0)33 563 915
E-mail: info@fomspd.ba
Web: www.fomspd.ba

podmladimo politiku!

UVOD

Forum mladih SDP BiH je posebni oblik organizovanja koji okuplja mlade ljude socijaldemokratske orijentacije i progresivnih ideja. Slijedeći Program i Statut SDP BiH, Forum mladih SDP BiH radi na razvoju političke i društvene svijesti kod mlade populacije, prema principima socijaldemokratije.

Forum mladih SDP BiH svoj pogled na svijet zasniva na principima slobode, jednakosti, pravde, solidarnosti, ljudskih prava, ravnopravnosti polova, te idejama antifašizma.

Forum mladih djeluje na lokalnom, regionalnom i državnom nivou, preko oblika organizovanja SDP BiH i Foruma mladih SDP BiH određenog nivoa (kantonalnih/regionalnih i općinskih organizacija SDP BiH i FOM SDP BiH) i na taj način sprovodi svoja programska opredjeljenja.

Program FOM SDP BiH, za koji se danas opredjeljujemo, je naš put ka ostvarivanju istih mogućnosti i ljudskih prava za bolju budućnost svih Bosanaca i Hercegovaca, a prvenstveno mladih ljudi u modernoj i evropskoj Bosni i Hercegovini.

1. LJUDSKA PRAVA

Ljudska prava su najveća vrijednost na kojoj bi trebalo da počiva svaki društveni i politički sistem. Borba za ostvarenja ljudskih prava je dugotrajan proces.

Svi Bosanci i Hercegovci jednaki su i ravnopravni građani Bosne i Hercegovine bez obzira na svoju vjeroispovijest, rasu, boju kože, političku, etničku ili nacionalnu pripadnost, kulturu, jezik, starost, seksualnu orijentaciju, psihički ili fizički invaliditet ili neku drugu pripadnost.

FOM SDP BiH se zalaže za ukidanje viznog režima. Vizni režim narušava osnovno ljudsko pravo pojedinca za slobodu kretanja, bez ograničenja.

Forum mladih će insistirati na sprovedbi Evropske konvencije o pravima mladih iz 1992. godine. FOM će se rukovoditi odredbama pomenute konvencije u svom radu i provedbi ovoga Programa.

Smatramo da su mladi najveća komparativna prednost Bosne i Hercegovine, te je poštivanje njihovih prava jedan od uslova ostanka u BiH. Na osnovu pomenutog smatramo da se na državnom nivou treba uspostaviti Ministarstvo za mlade koje će raditi na implementaciji projekata EU s ciljem integracije mladih u evropske i svjetske tokove i na taj način pružiti mladima priliku za afirmaciju i dati nadu u svjetliju budućnost u svojoj zemlji.

Smatramo da je na državnom, entitetskom, kantonalnom i općinskom nivou u BiH potrebno u zakonodavnim tijelima formirati Skupštinske komisije za pitanja mladih, koje bi u saradnje sa političkim podmladcima i omladinskim udruženjima radili na rješavanju aktualnih pitanja mladih iz tih sredina.

2. OBRAZOVANJE

FOM SDP BiH se zalaže za znanje kao najviši imperativ. Zalažemo se da se svima omoguće iste mogućnosti i uslovi za obrazovanje.

FOM SDP BiH se zalaže da se djeci i omladini sa posebnim potrebama obezbijedi kvalitetan i dostupan sistem osnovnog i srednjeg obrazovanja, koji će im omogućiti integraciju u društvene tokove, bez segregacije, i uz puno poštivanje ljudskih prava.

2.1. OSNOVNO I SREDNJE OBRAZOVANJE

Osnovne škole predstavljaju osnovnu stepenicu u obrazovanju i one moraju biti mjesto gdje će djeca stvarati radne navike i razvijati interes za sticanje znanja. Podržavamo uvođenje devetogodišnjeg osnovnog obrazovanja, ali insistiramo da dođe do uvođenja cjelodnevnog boravka djece u školi. Na taj način se djeci daje šansa da se druže, razmjenjuju znanje, zajednički rade i igraju se.

FOM SDP BiH se zalaže da se u osnovnim i srednjim školama u potpunosti realizuju jedinstveni nastavni planovi i programi rada, neopterećeni sadržajima vjerske, nacionalne, spolne ili bilo koje vrste diskriminacije.

2.2. VISOKO OBRAZOVANJE

Primjena Bolonjske deklaracije je jedini put za ostvarivanje kvalitetnijeg visokoškolskog obrazovanja.

Sistem visokog obrazovanja treba reformisati i prilagoditi evropskim i svjetskim standardima kako bi se diplome stečene u BiH priznavale na univerzitetima širom svijeta.

Potrebno je stimulisati mlade stručnjake na povratak u BiH nakon usavršavanja u inostranstvu i priznavati njihove diplome bez ponovnog polaganja ispita.

Zalažemo se da se studentima omoguće povoljni studentski krediti i stipendije, jer bi jedino na taj način studenti postali samostalniji i manje zavisni od finansijske pomoći roditelja.

Istrajavamo i dalje na principu subvencioniranja plaćanja visokoškolskih studija od strane države.

FOM SDP BiH smatra da trenutna ekonomska situacija većine stanovništva u Bosni i Hercegovini ne može ići u korak sa tržišnim vrijednostima srednjeg i visokog obrazovanja. Iako visoko obrazovanje nije obavezno smatramo da država koja je izašla iz rata sa razrušenim kapacitetima i rasutom pameću širom svijeta kao i relativnim zaostatkom u primjeni savremenih tehnologija mora ulagati u buduće kadrove ako želi da dostigne nivo održive kompetitivnosti u odnosu na ostale zemlje regiona.

Solidarnost, kao jedan od osnovnih postulata socijaldemokratije javlja se i ovdje kao obaveza društva da subvencionira potrebe za školovanjem onih koji se za dalje školovanje odluče, a koji to i pored svojih intelektualnih kapaciteta nisu sebi u stanju priuštiti.

FOM smatra da parcelizacija univerzitetskog života u BiH ne doprinosi kvalitetu studija i kadrova koji stižu univerzitetske diplome. To je naročito nepoželjno zbog neujednačenosti programa što još uvijek otežava nostrifikacije diploma stečenih u BiH u zemljama Evrope i Svijeta.

Zalažemo se za veći nivo učešća studenata u odlučivanju na fakultetima i univerzitetima preko afirmisanja studentskih asocijacija i uvođenja pozicija studenata prorektora i studenata prodekana.

FOM SDP BIH smatra da je uloga studentskih udruženja na fakultetima i studentskih asocijacija na univerzitetima od minornog značaja. Takvo stanje je neprihvatljivo jer su studenti korisnici usluga koje se pružaju na univerzitetu. Uvođenjem funkcije studenta prodekana ili studenta prorektora postigla bi se bolja komunikacija između Uprava fakulteta, profesora i studenata. Ulogu studentskih asocijacija i udruženja treba zakonski definisati, pri čemu treba odvojiti podružnice svjetskih studentskih asocijacija koje se uglavnom bave saradnjom raznih asocijacija, a ne statusom i svakodnevnim životom studenata.

Ispitni rokovi moraju biti prilagođeni potrebama studenata u skladu sa dinamikom nastavnih programa, ali ne smiju ići u prilog vječitim studentima na štetu onih odlučnih i upornih.

FOM SDP BIH se oštro protivi manipulisanju mladim ljudima od strane ekstremističkih grupa koje žele vjerskom isključivošću izazivati etničku, nacionalnu, rasnu i vjersku netrpeljivost, krijući se iza plašta brige za omladinu i studente te se zalaže za sankcioniranje takvih pojava u skladu sa krivičnim zakonom.

FOM izražava svoje ogorčenje istupima pojedinih samozvanih predstavnika omladine koji vrše hiperprodukciju deklaracija i rezolucija, trošeći novac poreskih obveznika na sopstvene samopromocije u medijima. Takvi pojedinci i grupe ne doprinose angažiranju mladih ljudi u politici i poboljšanju njihovog statusa već stvaraju lažnu sliku u društvu. FOM se zalaže za aktivno učešće mladih ljudi u izgradnji društva i države u kojoj žele živjeti u budućnosti, a ne za promociju praznih riječi.

3. EDUKACIJA ČLANOVA FOM SDP BiH

Edukacija bi se sprovodila iz 4 osnovna područja:

- a) Šta je to socijaldemokratija i koje su njene osnovne vrijednosti: sloboda, jednakost, pravda i solidarnost;
- b) Struktura države u kojoj žive, struktura partije koja se bori da dobije vlast da bi ostvarila svoja programska opredjeljenja i struktura FOM SDP kroz koji djeluju;
- c) Projektni pristup radu: kako se definišu ciljne grupe, kako se obrađuje aktuelan problem u društvu, kako se promovira u medijima, kako se koordinira rad FOM, SDP kao partije, predstavnika SDP BiH u zakonodavnoj i izvršnoj vlasti, kako rezultate predstaviti javnosti tj. na koji način da ideja iz baze FOM dođe do zastupnika koji je projektovano prezentira i ubire političke poene koje FOM širi na terenu među mladom populacijom;
- d) Medijska obuka.

Edukacija bi se provodila kontinuirano u općinskim organizacijama i svi bi bili obavezni da je prođu. Oni koji bi prošli kompletnu obuku postali bi s vremenom i praksom izgrađeni budući kadrovi partije.

4. KULTURA

Kultura je u Bosni i Hercegovini zapostavljena do kritične tačke egzistencije, kako kulturnih radnika tako i samih kulturnih dešavanja. Rasparčanost institucija koje se bave kulturom na kantonalne i entitetske, pa i općinske nivoe, te minimalna sredstva koja se izdvajaju dovele su kulturu na najnižu stepenicu brige društva.

Zapuštenost domova kulture, biblioteka, muzeja, pozorišta, umjetničkih galerija je samo odraz brige društva za kulturni život. Smatramo da je ulaganje sredstava u obnovu ovih kulturnih centara i veća izdvajanja za kulturu od općeg interesa kao prvi korak na povratku izvorne kulture i stimulacije kulturnih radnika, nasuprot uvoznoj kulturi sa istoka i zapada.

FOM SDP BiH se treba zalagati da kroz javne akcije, pritiskom na nosioce vlasti i predlaganjem novih zakonskih regulativa pomogne kulturnom razvoju naše zemlje. Treba se zalagati za preraspodjelu entitetskih i državnog budžeta u korist kulture.

Potrebno je intenzivirati međunarodnu razmjenu kulturnih stvaralaca i njihovih djela.

5. VJERA I VJERSKO UVJERENJE

Svaki čovjek ima pravo na slobodu ispoljavanja vjerskog uvjerenja. Vjersko uvjerenje svakog čovjeka je njegova privatna stvar i niko nema pravo da ga primorava na izjašnjenje ili opredjeljenje.

FOM SDP BiH priznaje posebno značenje i pravni status svim vjerskim zajednicama i crkvama koje ne propagiraju mržnju i nasilje i djeluju u skladu sa Ustavom i zakonima Bosne i Hercegovine. U propovjedanju, duhovnoj brizi i učenju one treba da budu samostalne i da ne podliježu državnom i političkom uticaju, kao što ni država ne treba da podliježe uticaju crkve i vjerskih zajednica.

FOM SDP BiH se protivi i bori protiv zloupotrebe vjere i vjerskih osjećanja pojedinca. Protivimo se svakom obliku instrumentalizacije vjere i vjerskih osjećanja od strane vjerskih institucija u propagiranju i podržavanju agresivnog, militantnog nacionalizma i šovinizma.

6. MEDIJI

FOM SDP BiH se zalaže za slobodu govora, pisanja i izvještavanja i za slobodne i nepristrasne medije nepodređene interesima pojedinca, grupa ili lobija.

Zalažemo se za slobodu medija i njihove uređivačke politike.

7. SOCIJALNA POLITIKA

FOM SDP BiH smatra da država i njene institucije trebaju voditi veću brigu o socijalno ugroženoj djeci i omladini, a posebno nezbrinutoj djeci u domovima, kroz omogućavanje sredstava u budžetima općina, kantona i države za besplatne školske udžbenike, dječji doplati i sl.

Teška ekonomska i socijalna situacija u BiH dovela je do povećanog zlostavljanja djece i omladine. Djeca se sve više fizički maltretiraju, koriste za organizovanu prošnju po ulicama, a posljedica toga su mentalna i fizička oboljenja kod djece i omladine.

FOM SDP BiH smatra da treba podržati i pomoći rad humanitarnih i nevladinih organizacija, koje se bave zaštitom zlostavljane djece i omladine.

Na organe pravosudne vlasti treba izvršiti pritisak i tražiti pooštavanje kazni za fizičko i seksualno zlostavljanje.

8. ZAPOSŁJAVANJE

FOM SDP BiH se zalaže za sistemsko kreiranje programa zapošljavanja omladine nakon završene srednje škole ili fakulteta, te olakšice za poslodavce koji zaposle mlade osobe bez radnog staža.

Zalažemo se za izmjenu zakona koji regulišu radno-pravnu problematiku koja još uvijek za zapošljavanje postavlja uslov radno iskustvo na istim ili sličnim poslovima ili čak i radni staž od dvije godine u uvjetima kada 90 % mladih ljudi nakon rata nije imalo priliku da počne bilo šta raditi.

FOM SDP BiH smatra da je potrebno zakonski regulisati volonterski radi i priznati ga kao radno iskustvo koje je neophodno pri apliciranju za zaposlenje.

Potrebno je promovisati i stimulisati volonterski rad od strane Zavoda za zapošljavanje prema firmama i budućim volonterima.

Smatramo da je potrebno uvesti u državne (javne) ustanove mogućnosti za stažiranje mladih ljudi, te obezbjeđenje sredstava za polaganje stručnog ispita od strane istih.

9. STAMBENA PROBLEMATIKA

Po uzoru na poticaj zapošljavanja zalažemo se za stimulisanje rješavanja stambenih problema mladih, tako što će vlade na svim nivoima staviti na raspolaganje određena finansijska sredstava, odgovarajućim bankama, u svrhu davanja stambenih kredita pod povoljnim, nekomercijalnim uslovima.

FOM SDP BiH se zalaže za osnivanje stalnog fonda, na nivou države, koji će stimulisati mlade koji žele riješiti stambeno pitanje.

U skladu sa pozitivnim iskustvima, prvenstveno zapadnih evropskih zemalja, nadležne institucije vlasti trebaju imati, kao jedan od prioriteta, promovisanje i realizaciju namjenske izgradnje stambenih jedinica za mlade.

10. VOJNA OBAVEZA I CIVILNO SLUŽENJE VOJNOG ROKA

FOM SDP BiH se zalaže za ukidanje obaveznog služenja vojnog roka. Istovremeno nikom se ne osporava ili onemogućava pravo da služi vojni rok, ukoliko izrazi želju za to. Međutim, svi oni koji ne žele služiti vojni rok ne smiju biti zakonom primorani na to.

Podržavamo mogućnosti izbora civilnog služenja vojnog roka.

FOM BiH smatra da slobodnog i demokratskog društva nema bez poštivanja ljudskih prava i sloboda. Jedan od uslova za ulazak Bosne i Hercegovine u Evropsku uniju i druge međunarodne institucije i integracije je da se kroz rad državnih organa obezbjedi donošenje kvalitetnih zakona i da se osigura njihovo dosljedno sprovođenje.

Shodno tome FOM SDP BiH podržava mogućnost izbora civilnog služenja vojnog roka koji je u našoj zemlji predviđen Zakonima o odbrani koja se ostvaruje ulaganjem "Prigovorom savjesti" na vojnu službu.

Prigovor savjesti na obavezno služenje vojnog roka znači pravo pojedinca da odbije služenje vojnog roka radi svojih moralnih, vjerskih, filozofskih, političkih i drugih uvjerenja zbog kojih ne može biti pripadnik oružanih snaga.

Pravo na prigovor savjesti je jedno od osnovnih ljudskih prava i najčešće se vezuje za pravo na slobodu mišljenja, savjesti i vjerskih opredjeljenja, te kao takvo zaslužuje veću pažnju kao i veću primjenu u praksi što do sada nije bio slučaj.

Neophodno je izjednačiti civilno i vojno služenje vojnog roka, osigurati ravnopravno promoviranje civilnog vojnog roka i obavezu vojnih organa o informisanju vojnih obveznika o njihovom pravu izbora da svoju građansku obavezu imaju pravo ispuniti u vojnoj ustanovi, sa oružjem ali i u civilnim institucijama, bez oružja. Priznavanjem prava na prigovor savjesti omogućiće se svima koji smatraju da na drugačiji način, služenjem bez oružja, mogu biti korisniji društvu i to svoje pravo i ostvare.

Kad je provedba ovog zakona u pitanju FOM SDP BiH smatra da je potrebno izvršiti dopune zakona u smislu da državne institucije preuzmu obavezu za prijem regruta koji zatraže civilno služenje vojnog roka.

11. BORBA PROTIV NARKOMANIJE

Narkomanija predstavlja veoma težak problem ne samo za ovisnika i njegovu okolinu već i za cijelo društvo.

Ona je jedan od osnovnih pokretača lanca organiziranog kriminala u koji spada prostitucija i maloljetnička delikvencija. Opasnost predstavljaju i bolesti kao što su razni oblici hepatitisa, AIDS, spolne i kožne bolesti, a koje se prenose često i kroz konzumaciju narkotika. Stoga je edukaciju o opasnostima od narkomanije neophodno provoditi i kod mladih i kod roditelja, s tim što mora biti prilagođena uzrastu.

Posebnu pažnju je potrebno posvetiti i odvikavanju od narkomanije za one koji su se predali tom poroku. Educiranje bi trebali vršiti isključivo stručna lica uz pomoć i podršku širih struktura društva.

FOM SDP BIH se stoga zalaže za izgradnju posebnih centara za odvikavanje od narkomanije, uvođenje posebnog predmeta u srednjim školama koji bi tretirao narkomaniju, te bolju koordinaciju Ministarstva unutrašnjih poslova sa širim društvenim strukturama u borbi protiv zloupotrebe narkotika.

Smatramo da se protiv narkomanije ne može boriti stihijski, pojedinačno i svako na svoj način. Protiv narkomanije se bori jedinstveno i zajedno sve institucije vlasti. Potrebno je inicirati donošenje državne «Strategije borbe protiv narkomanije» koja je neophodna da bi se uvezali svi nivou vlasti u BiH i koordinisano i istom metodologijom borili na suzbijanju upotrebe droga.

Što se tiče legalizacije lakih droga, koja se javlja kao trend u svijetu, smatramo da poratna stvarnost Bosne i Hercegovine i želja mladih da od te stvarnosti pobjegnu na razne načine u kombinaciji sa legalizacijom lakih droga ne bi dala pozitivne, već naprotiv negativne rezultate.

12. BORBA PROTIV SIDE

AIDS je trenutno u svijetu najsmrtonosnija bolest izazvana virusnom infekcijom.

Bosna i Hercegovina ne spada u grupu rizičnih zemalja prema broju registrovanih oboljelih. Međutim položaj BiH i trenutna društvenopolitička situacija kao i institucije koje još nisu u stanju izaći na kraj sa narkomanijom i organiziranom prostitucijom, čije širenje pogoduje širenju AIDS-a, dovode u sumnju istinitost zvaničnih podataka.

Kako prema zvaničnoj statistici 70 % korisnika usluga prostitucije jesu BH građani, a najveći dio davaoca usluga dolazi iz rizičnih zemalja dovode se u pitanje zvanični podaci. Također i pomjeranje dobne granice konzumenata narkotika otežava situaciju. Pomenuto stanje usložnjava i nedovoljna informiranost i edukacija dijela BH stanovništva o ovoj bolesti i načinima prevencije.

Stoga se FOM SDP BIH zalaže za uvođenje posebnog predmeta u osnovnim i srednjim školama koji bi tretirao AIDS i ostale spolno prenosive bolesti. Odlučnijim sankcioniranjem prostitucije i uspostavljanjem mreže savjetovališta, a naročitom promocijom sredstava zaštite i načina prevencije moglo bi se preduprijeti širenje ove bolesti u BiH.

13. EDUKACIJA I ZAŠTITA OD ZAOSTALIH MINSKO-EKSPLOZIVNIH SREDSTAVA

Minsko-eksplozivna sredstva i dalje predstavljaju opasnost u mnogim krajevima BiH. FOM SDP BiH stoga smatra da bi jedan od prioriteta lokalnih i državnih vlasti trebao biti i deminiranje. Uporedo sa deminiranjem nužno je pojačati sprovođenje edukacije o opasnostima od minsko-eksplozivnih sredstava je su njihove žrtve najčešće djeca. Stoga djeci prilagođene brošure, manifestacije i prezentacije mogu biti uspješan metod prevencije. Koordinacija vladinog i nevladinog sektora u ovom slučaju je od izuzetne važnosti kao i podrška međunarodne zajednice.

14. RAZVOJ AMATERSKOG SPORTA

Vodeći se parolom "U zdravom tijelu zdrav duh" smatramo da je potrebno veću pažnju posvetiti amaterskom sportu koji bi služio izgradnji mladih sportista koji jednog dana trebaju predstavljati boje svoje zemlje.

Sportska kultura u osnovnim i srednjim školama, kao i na fakultetima često je bila na margini. Iz pomenutih razloga smatramo da bi predstojeća reforma obrazovanja trebala tretirati i ovaj segment. Mlade treba usmjeriti da se bave sportom umjesto da budu prepušteni ulici i porocima narkomanije i alkoholizma.

Pored aktivnog bavljenja sportom treba pažnju posvetiti i samoj sportskoj kulturi koja je na jako niskom nivou, pogotovo kada se radi o navijanju i ispoljavanju nacionalističke i rasističke netolerancije. Ove prizemne strasti često se ispoljavaju prilikom sportskih susreta gdje se susrećemo sa nasilničkim ponašanjem koje je potpuno u suprotnosti sa osnovnom kulturom pa i sportskom. Zbog toga se zalažemo za sankcioniranje ovakvih pojava, a naročito pojedinaca koji su inicijatori ovakvih incidenata, ali i za preventivnu borbu protiv ovog socijalnog problema kroz edukaciju u školama i sportskim institucijama.

Što se tiče profesionalnog sporta, smatramo da država, koliko je u njenoj moći, putem svojih institucija, treba stvoriti okruženje kako bi se omogućilo profesionalnim sportistima i klubovima da se razvijaju prema savremenim principima djelovanja.

15. HUMANITARNI RAD

Humanitarni rad smatramo praktičnom realizacijom jednog od principa socijaldemokratije – SOLIDARNOSTI. Podržavaćemo sve aktivnosti i inicijative članova FOM SDP BiH i drugih omladinskih udruženje u ovom segmentu društvenog djelovanja.

16. EKOLOGIJA

Razvijanje ekološke svijesti kod mladih smatramo preduslovom aktivnijeg bavljenja ekologijom u budućnosti. Živjeti u zdravoj i nezagađenoj sredini jedno je od osnovnih ljudskih prava. Djelovanje državnih institucija mora biti koordinirano sa radom nevladinih organizacija kao i samih građana.

Eksploatacija prirodnih bogatstava Bosne i Hercegovine mora biti stavljena pod jaču kontrolu jer direktno ugrožava prirodnu sredinu. Zalažemo se za izradu jedne cjelovite analize ekološkog stanja Bosne i Hercegovine s osvrtom na onečišćenje, prirodne sredine, eksploataciju prirodnih bogatstava, kao i uzročnu povezanost sa sve češćim pojavama teških tjelesnih oboljenja.

Posebnu pažnju treba posvetiti zaštiti vodotokova koji su usljed nemara ljudi i države postali deponije najrazličitijeg otpada. Rijeke su simboli Bosne i Hercegovine, a prije rata BiH je imala najveće riječne potencijale, kao i najveći kvalitet vode. Smatramo da se hitno trebaju poduzeti koraci koji će sanirati štete nastale nemarom proteklih godina.

17. POLITIKA I PARTICIPACIJA MLADIH U DRUŠTVU

Forum mladih SDP BiH raditi će na edukaciji i zalagati se za aktivniji angažman mladih ljudi u omladinskim organizacijama, studentskim asocijacijama, nevladinim organizacijama i sl.

Ostvarivati bolju saradnju sa podmladcima ljevičarskih partija u BiH i van nje, kao i međunarodnim organizacijama koje okupljaju mlade ljude.

FOM SDP BiH raditi će na rješavanju generacijskog jaza i uspostavljanju aktivne uloge mladih ljudi u kreiranju i razvoju demokratskog društva u BiH, kroz pojedine segmente društva: politika, obrazovanje, kultura, sport, muzika..., te inicirati donošenja Zakona o mladima, Državni program za afirmaciju mladih u društvu i sl.

Zagovarati otvaranje omladinskih centara koji za cilj imaju socijalizaciju mladih u društvo, te sklanjanje sa ulice i od njenih negativnih uticaja (droga, besposličarenje, kriminal i dr.).

18. MEĐUNARODNA POLITIKA I SARADNJA

18.1. BOSNA I HERCEGOVINA I EVROPSKA UNIJA

Forum mladih Bosnu i Hercegovinu vidi kao modernu evropsku zemlju, i ravnopravnu članicu Evropske Unije, koja, kao takva, preuzima sva prava, ali i obaveze koje članstvo u Evropskoj Uniji donosi.

Smatramo da je Bosni i Hercegovina zemlja koja stoji na raskrsnici zapada i istoka, bitan segment Evrope.

Forum mladih smatra da se Bosna i Hercegovina mora aktivnije uključiti u evropski integracijski proces i početi ispunjavati uvjete potrebne za pristupanje EU, prije svega zbog poboljšanja životnih uvjeta samih građana Bosne i Hercegovine.

Bosna i Hercegovina, što zbog ratnog sukoba, što zbog nesposobnosti nacionalističkih vlasti koje su u periodu nakon rata "vodile" zemlju, kasni u odnosu na druge zemlje u tranziciji u pregovorima s evropskim partnerima radi uključivanja pravnih normi i evropskih vrijednosti u svoj sistem.

18.2. FORUM MLADIH SDP BiH NA MEĐUNARODNOM PLANU

Forum mladih je punopravan član IUSY-ja (Internacionalne unije socijalističke omladine). Forum mladih mora nastaviti graditi međusobno dobre odnose sa IUSY-jem, te nastaviti participirati u aktivnostima IUSY-ja, te i u organizaciji međunarodnih sastanaka, seminara i susreta u okviru IUSY-ja.

Forum mladih je član ECOSY-ja sa posmatračkim statusom. Budući da su podmladci europskih socijalističkih partija članica EU punopravni članovi ECOSY-ja, Forum mladih će se kroz zalaganje za stupanje u punopravno članstvo ECOSY-ja istovremeno zalagati za što skorije pristupanje Bosne i Hercegovine EU.

Forum mladih će nastaviti graditi i razvijati bilateralne odnose kako sa susjednim socijaldemokratskim organizacijama i organizacijama iz regiona, tako i sa socijaldemokratskim organizacijama iz Europske Unije i svijeta.

Jedna od najvažnijih zadaća Foruma mladih je održavanje i daljnje unapređenje dobrih odnosa sa susjednim socijaldemokratskim organizacijama. Forum mladih će se zalagati sa kontinuitet suradnje i zajedničkog rada na rješavanju pitanja, problema i poboljšanju statusa mladih u region, te na poboljšanju pozicije unutar krovnih organizacija kojih smo članovi.

Forum mladih smatra da samo kroz realno i otvoreno sagledavanje posljednjih sukoba, te pronalazak zajedničkih stavova i solucija za rješavanje postojećih problema unutar regije, možemo pokazati i dokazati da smo spremni da lakše savladamo prepreke na koje Bosna i Hercegovina, kao zemlja u tranziciji, nailazi na putu ka Europskoj Uniji.

Forum mladih će nastaviti graditi suradnju i povezivanje općinskih organizacija FOM SDP BiH i ogranaka ili cjelovitih socijaldemokratskih organizacija regiona i Europe. Forum mladih će nastojati da kroz zajedničke projekte intenzivnije poveže članove Foruma mladih sa članovima socijaldemokratskih podmladaka regiona i Europe, kako bi kroz međusobnu suradnju imali priliku razmijeniti iskustva, mišljenja, prijedloge i projekte, te tako doprinijeti širenju ideje socijaldemokratije među mladima.

19. ANTIFAŠIZAM

Polazeći od svojih osnovnih principa, slobode, solidarnosti, jednakosti i pravde, antifašističke prošlosti Bosne i Hercegovine, te svojih prirodnih veza sa SUBNOAR-om i ostalim udruženjima koja njeguju antifašističku tradiciju, Forum mladih njegujući tekovinu antifašizma, istovremeno se opredjeljuje za osiguranje osnovnih prava i sloboda ličnosti i naroda, humano, demokratsko i jednakopravno društvo. Najoštrije osuđujemo fašističke i nacionalističke pokrete u svijetu, a posebno u Bosni i Hercegovini.

Forum mladih nastavit će se boriti protiv nacionalizma, šovinizma, ekstremizma, netolerancije, te svih ostalih oblika fašizma. Naša obaveza je da i dalje radimo na promociji antifašizma i približavanju ideala i ciljeva tog svjetskog pokreta među mladim ljudima.

20. AFIRMACIJA MLADIH ČLANOVA SDP BIH U IZVRŠNOJ I ZAKONODAVNOJ VLASTI

Mladi članovi FOM-a i SDP BIH koji su se našli u strukturama zakonodavne i izvršne vlasti na svim nivoima primjer su uloge i sposobnosti mladih ljudi u izgradnji društva. Mladi kandidati SDP na listama za sve niveoe vlasti ističu svoju odlučnost i opredijeljenost da aktivnom ulogom doprinesu zajedničkom boljitku, promociji demokracije, ljudskih prava i vizije boljeg života u Bosni i Hercegovini, a ne van BiH.

Mladi kadrovi FOM SDP BIH će biti involvirani u društvene tokove, svako na svoj način da bi bolje prenijeli zahtjeve društvenih skupina političkom rukovodstvu i svojim kolegama koji su na istaknutim pozicijama. FOM SDP BIH je otvoren za saradnju sa svim podmladcima političkih stranaka koje imaju sličan program kao i za nevladine organizacije.

Mladi socijaldemokrati će promovirati i zalagati se za ostvarene osnovnih vrijednosti socijaldemokratije u svim aspektima društvenog života, u svakoj prilici i u svakoj funkciji koju obavljaju u FOM, u SDP, zakonodavnoj i izvršnoj vlasti.

SLOBODA, JEDNAKOST, PRAVDA I SOLIDARNOST, osnovni postulati ljevičarskog pokreta kao i program SDP BIH će i dalje biti vodilje naše političke aktivnosti.